

զգործ պատշաճ ունկնդրութեան. ի սոյն մաշեն և բազումք ի գեղջկաց զերկայնութիւն ձմերային գիշերոյ, առհասարակ արք և կանայք և մանկունք անգամ ախորժանօք անձանձիր լսելով զսքանչելի գործս Ռուստէմայ Սագճկի (Սաջաստանցւոյ կամ Սագաստանցւոյ) և զհրաշալիսն Բէշ նժուգի նորա՝ նմանահանգոյն արծուենման Սեաւին գեղեցկի մերս Արտաշիսի, զառասպելախառն այլաբանութիւնս քաջամարտ — դիւարաղ Հուշանգի՝ հանգոյն մերս վիշապաքաղ Վահագնի, զգիցանուէր վեհութիւնս արգարագատն Անուշիրուանայ (Անուշաւանայ), նա մանաւանդ զհրաշապատում վէպն Քրանգիսի, լի չքնաղ նահատակութեամբք առաքինութեան և կենդանի նկարութեամբք, այլովքն հանդերձ, յորոց առ այժմ զայս երկու դոյզն հատուածս և եթ առ ձեռն պատրաստ ունիմք ի լոյս ընծայել, զընտրելագունիցն թարգմանութիւն թողլով այլում նուագի:

Սամուէլ Գիւլշադեանց.

1.

Ի ՄԱՀ ՔԱՋԻՆ ՍՖԱՆԴԵԱՐԱՅ (ՍՊԱՆԴԱՐԱՅ).

Ժամ է արդ քամել բաժակ մի անապակ անուշահամ գինւոյ՝ մինչդեռ շունչ քաղցրասիք գարնան բերէ մեզ զհոտ անուշից հովասուն լերանց, Ծաղիկք գարնանայինք պսակեն զսաղարթս անտառախիտ մայրեաց և բլուրք շողան ի փայլիւն հրաշէկ կակաչաց և ի նարօտ պէսպէս երանգաց, Հրճուէ սոխակ գեղգեղելով ի ծոց սիրանոյշ վարդենեաց և գոհար վարդ փթթէ պշրանօք ի լուր երգոց խօսնակին:

Եւ լիցի՞ն արդեօք այլ ևս լսելի հեշտալուր դայլայլիկք նորա, յորժամ բաժակն վարդագոյն՝ վարդենւոյ ծածկեսցի մարգարտաշար քաղցրահոտ ցօղով գիշերոյ. — Ո՛չ. աւանիկ յառաջ խաղայ ամպ մռայլ՝ հալածական վարեալ ի փոթորկալից հողմոյ . . . Ոչ է այդպէս՝ յորժամ նստեալ խօսնակն ի գեղուղէշ փունջ վարդենեաց՝ երդէ զսէր իւր խանդակաթ. Ո՞ գիտէ զի՞նչ նա խօսի արդ . . .

Նա ողբայ զՍպանդար. զՍպանդարն բարձեալ կապտեալ ի փառաց անդստին ի մատաղատունկ տիոցն երիտասարդութեան, Նա պատմէ քեզ յորդելով զհինաւուրց անցից անցելոց, զոր սովոր էին նախնիք մեր պատմել հարցն մերոց:

2.

ՄԵՆԱՄԱՐՏ ՔԱՋԻՆ ՍԱՄԱՅ.

Ընդ երևիլ հզօր արքային Մանուշէհրի (Մանաճիհրի), անկաւ անդէն որդի նորա Սամ ի վերայ երեսաց և երկիր եպագ նմա, Յարեաւ հայրն օգոստափառ ի գահոյիցն փղոսկրեայ և սփռեցին կայծակունս հրոյ մեղեսիկք և տպագիտնք ականազարդ թագի նորա, Զգեալ զձեռն իւր շնորհալից, նստոյց առ իւր զՍամ, և ի հարցանել հօրն ստիպաւ՝ թէ զի՞նչ եղեն գայլքն մարդախոշօշք՝ խուժադուժքն Մազանդրանեայք (Արկանք), ետ

պատասխանի Սամ և ասէ. Ո՛չ ևս են, հայր, և յաւել պատմել նմա զելս պատերազմին՝ օրինակ զայս.

Դիմեալ գայր որպէս գայլ արեան ծարաւի՝ անցեալ ի գլուխ հրոսակին՝ Վարկաւոյ եղբօրորդի մեծի արքային Սալեմայ, Չափ հասակի նորա վիթխարի հաւասարէր մատաղատունկ մայրւոյ և քաջքն դիւցազանց անգամ խիթային յերեսաց հսկային սերելոյ ի զոհակազարմ վիշապածին մօրէ.

Իբրև տեսին զնա քաջամարտիկքն իմ ընդ մէջ փոշւոյն փոթորկելոյ ի ներքոյ ոտից նորա, շրջեցաւ անդէն գոյն երեսաց նոցա ի դալուկն մեռելատիպ. Ի բաղխել մարտին երկուստեք, յարձակեցայ անկայ հապճեպ ի մէջ հեծելազօրուն, և ընդ մէջ ճեղքեալ զգունդն ստուարախիտ՝ հորդեցի ինձ ռահ զարհուրելի երկաթագամ գնդափայտիւս. Սլացաւ նժոյգն իմ օդապարիկ զերթ փիղ ամենի և երկիր ստսանէր ի ներքոյ ոտից սալասմբակ երիվարացս հանգոյն ալէծուփ կոհակաց նեղոսի. Քաջալերեցաւ յիս գունդն իմ և զհետ իմ խեղախեաց ի վտանգիցն աներկեան.

Իբրև ետես Վարկաւոյ զնախճիրս իմ, զոր ընդ աջ և ընդ ահեակ ճակատուն գործէի, ծանեաւ զիս, և հանգոյն յանդուգն որսահալած վագեր թակարդէր ինձ զպարան ձեռին ըմբռնել զիս ի հաղբ. Գիտացի զնենգութիւն մտացն, կալայ զաղեղն իմ և արձակեցի դէպ ուղիղ ի նա զերկաթասլաք նետս իմ կաղամախեայ. Թռեան նետքս թեթև զերթ արծուի սրաթուիչ . . . կորեաւ նա վայրիկ մի յաչացս և ահա անդրէն միւսանդամ եկն յերևան դէմյանդիման իմ ի մէջ արիւնախառն փոշւոյ, ճոճելով ի ձեռին զքուրն իւր պողոպպատիկ ականակուռ, և դողայր երկիր ի գոփիւն ոտիցն. Դուլ ետու խուն ինչ երիվարին իմում և կացի մնացի նմա անդէն կուռ և կաղմ. Թարձակեցաւ յիս վայրագն վարազարար. կշռեաց ետ ընդ ետ զհարուածս մահարբեր սրոյն, այլ իմ խոյս տուեալ ի սրոյն, վրիպեաց կշիռն. դարձայ շուտափոյթ, բուռն հարի զօաղաւարտէն և անհաւատալի իմն ուժգութեամբ ընդ թափ կործանեցի զնա յերկիր արիւնաշաղախ և մսեցի զսուր իմ յախոնդիսն.

ՖՐԴՈՒՍԻ

Թ-ԴԺ. ՍԱՄՈՒԷԼ ԳԻԻԼԶԱԴԵԱՆՆՑ.